

- राज्य सरकार 10 अल्ट्रा मेगा परियोजनावां सारू खास सहायता पैकेज ने मंजूरी दीनी।
- केन्द्र सरकार एक लाख करोड़ रुपया री मदद सागे अर्बन चैलेंज फण्ड सरू करेला।
- केन्द्रीय मंत्री अन्नपूर्णा देवी कह्यो-सरकार महिलावां ने काम सारू हिफाजत रो माहौल अर बराबरी रा मौका देवण माथे खास ध्यान दे रही है।
- जोधपुर मांय जलवायु परिवर्तन उत्कृष्टता केन्द्र खोलण सारू आईआईटी अर राजस्थान राज्य प्रदूषण नियंत्रण बोर्ड बीचे करार।

000

बोर्ड ऑफ इन्वेस्टमेंट' री छठी मीटिंग आज जयपुर मांय राखी ज्यी। मुख्यमंत्री भजनलाल शर्मा री सदरत मांय व्ही मीटिंग मांय 10 अल्ट्रा मेगा परियोजनावां सारू खास मदद री मंजूरी दीरीजी। आं परियोजनावां रे ज़रिये प्रदेश मांय कारखानां रा विकास अर निवेश ने बधावो मिलेला। ई मौके उद्योग अर वाणिज्य मंत्री कर्नल राज्यवर्धन राठौड़ अर मुख्य सचिव वी. श्रीनिवास ई मौजूद हा।

000

नई दिल्ली रा साउथ ब्लॉक मांय केन्द्रीय मंत्रिमंडल री काल आखिरी मीटिंग व्ही। सूचना अर प्रसारण मंत्री अश्विनी वैष्णव नई दिल्ली मांय खबरनवीसां ने आ जाणकारी दीनी। वे कह्यो के मंत्रिमंडल री आवती बैठकां सेवा तीर्थ मांय व्हेला। श्री वैष्णव बतायो के मंत्रिमंडल एक लाख करोड़ रुपया री केन्द्रीय मदद सागे अर्बन चैलेंज फंड सरू करण री ई मंजूरी दीनी। केन्द्रीय मंत्री बतायो के देश मांय बधता स्टार्टअप इकोसिस्टम ने और बधावो देवण सारू मंत्रिमंडल स्टार्टअप इंडिया फंड ऑफ फंड्स रा दूजा दौर री ई मंजूरी दे दीनी, जिण रो मकसद देश रा स्टार्टअप इकोसिस्टम ने बधावो देवण सारू पूंजी री व्यवस्था करणो है।

000

लोकसभा अध्यक्ष ओम बिरला अर ऊर्जा मंत्री हीरालाल नागर आज कोटा जिला रा कनवास मांय विकास रा 37 करोड़ 28 लाख रुपया ऊँ बत्ता खर्च वाळा कामां री सरूआत कीनी अर पूरा व्ह्या काम जनता ने संप्या। आं मांय 18 करोड़ रुपया ऊँ बत्ता खर्च ऊँ बणायी ज्यो 132 किलो वोल्ट बूता रा जीएसएस अर जालिमपुरा मांय सामुदायिक भवन ने और मोटो करण रा काम शामिल है। ई सागे ई 9 करोड़ रुपया रा खर्चा ऊँ बणाया जावण वाळा पॉलिटेक्निक कॉलेज भवन अर धूलेट अर खजूरना मांय बणाया जावण वाळा नुवा बिजली ग्रिड रा काम री नींव ई रखी ज्यो। ई मौके लोकसभा अध्यक्ष ओम बिरला कह्यो के आं परियोजनावां ऊँ ई हलका री किसानां अर विद्यार्थियां ने खूब फायदो मिलेला।

000

डाक विभाग कठपुतली ऊँ जुड़ी परंपरावां रा बारा मांय भारत की कठपुतली मुद्दा माथे आठ स्मारक डाक टिकटां रो सेट जारी कीनो। विभाग री सचिव वंदिता कौल नई दिल्ली मांय न्यारी-न्यारी हस्तियां री मौजूदगी मांय ओ टिकट जारी कीनो। ई मौके वे कह्यो के डाक टिकट देश री विरासत रा नान्हा राजदूत है। वंदिता कौल कह्यो के ई खास अंक मांय वां अमर कहानीकारां रो मान करी ज्यो है, जो पीढ़ियां ऊँ भारत री लोककथावां अर मूल्यां ने सहेज र राखी है।

000

केन्द्रीय महिला अर बाल विकास मंत्री अन्नपूर्णा देवी कह्यो है के सरकार हर हलका ने महिलावां सारु सुरक्षित बणावण अर वां ने काम रा बराबर मौका मुहैया करावण माथे खास ध्यान दे रही है। वे काम री ठौड़ महिलावां री हिफाजत रा बारा मांय नई दिल्ली मांय राखी ज्या राष्ट्रीय सम्मेलन मांय बोल रही ही। अन्नपूर्णा देवी कह्यो के महिला अर बाल विकास पोर्टल महिलावां सारु काम री ठौड़ शिकायतां दर्ज करावणो आसान बणा दीनो है। मंत्री कह्यो के काम री एक लाख ऊं बत्ती ठौड़ां वाळा ई पोर्टल माथे नाम मंडाया है।

000

डूंगरपुर मांय राजीविका री ओर ऊं लगायी ज्या राज सखी मेळा मांय प्रदेश रा न्यारा—न्यारा जिलां ऊं आयी महिला स्वयं सहायता समूहां री सदस्य हाथ ऊं बणायी ज्यी कपड़ां, मोजड़ियां अर हर्बल गुलाल सरीखा सामान रो दरसाव कर रही है। सात दिन रा ई मेळा रो मकसद बिचौलियां ने हटा र महिलावां ने सीधो बाजार मुहैया करावणो है। मेळा मांय भाग ले रही तुलसी चौहान बतायो के हाथ री कारीगरी रे मार्फत गांवां री महिलावां री आमदनी बधी है।

000

आईआईटी जोधपुर मांय 'जलवायु परिवर्तन उत्कृष्टता केंद्र' खोल्यो जावेला। ई सारु आईआईटी अर राजस्थान राज्य प्रदूषण नियंत्रण बोर्ड बीचे डोढ़ सौ करोड़ रुपया रा करार माथे सही करी ज्यी है। ई केंद्र मांय नान्हा लेवल माथे जलवायु अर वायु प्रदूषण ऊं जुड़्या नक्शा बणाया जावेला। ई सागे ई लू, बाढ़ अर सूखा री वां ई बगत जाणकारी देवण रो सिस्टम विकसित कर्यो जावेला।

000

प्रतापगढ़ जिला रा बड़ी सादड़ी मांय सड़क बणावण सारु राज्य रा बजट मांय 5 करोड़ अर जाखम बांध ऊं पीवण रो पाणी मुहैया करावण री परियोजना री विगतवार प्रोजेक्ट रिपोर्ट बणावण सारु 1 करोड़ 37 लाख रुपया रो प्रावधान करी ज्यो है। ई सागे ई सुहागपुरा मांय बिजली रो सुबीतो और बेहतर बणावण सारु नुवो ग्रिड सब—स्टेशन बणायो जावेला अर राजपुरिया मांय पुलिस चौकी खोली जावेला। जिला जेल मांय कैदियां सारु लॉकर्स बणाया जावेला अर बच्चां रे वास्ते चिल्ड्रन होम खोल्यो जावेला। 5 हजार 900 करोड़ रुपया रा खर्च वाळी अनास नदी जल परियोजना ऊं ई प्रतापगढ़ जिला ने फायदो मिलेला। राजस्व मंत्री हेमंत मीणा राज्य रा बजट रा बारा मांय आज प्रतापगढ़ मांय खबरनवीसां सागे बातचीत करता थकां आ जाणकारी दीनी। वे कह्यो के राज्य रा माली साल 2026—27 रा बजट रो आकार 6 लाख 10 हजार 956 करोड़ रुपया है।

000

महाशिवरात्रि काल मनायी जावेला। ई सारु प्रदेश रा शिव मिन्दरां मांय तैयारियां करी जा रही है। सर्वाईमाघोपुर जिला मांय शिवाड़ रा घुश्मेश्वर महादेव मिन्दर मांय आज ध्वजा चढ़ावण सागे सालाना मेळो सरु व्ह्यो। म्हाणा सर्वाईमाघोपुर खबरनवीस बताये के ओ मेळो 19 फरवरी ताई चालेला।

000

पाली जिला रा सादड़ी मांय ई अरावली री डूंगरियां मांय परशुराम महादेव मिन्दर मांय काल चार पहर री आरती अर भस्म आरती करी जावेला। वठे जातरुआं सारु गुफा वाळा ई मिन्दर रा पट 24 ई घंटा खुल्या रेहवेला। मुख्यमंत्री भजनलाल शर्मा महाशिवरात्रि रे मौके जनता ने शुभकामनावां दीनी है। वां रा संदेश मांय मुख्यमंत्री कह्यो के महाशिवरात्रि जनता रा भला आ सेवा री सीख देवे है।

000

राजस्थान माध्यमिक शिक्षा बोर्ड री ओर ऊं ली जा रही परीक्षा रा तैत आज मैट्रिक रो व्यावसायिक शिक्षा अर सीनियर सैकेण्डरी रा लोक प्रशासन विषय रो पेपर व्ह्यो। अजमेर मांय बोर्ड रा कमांड कंट्रोल रूम ऊं सीसीटीवी रे ज़रिए परीक्षावां री निगराणी करी जा रही है। बोर्ड रा सचिव गजेंद्र सिंह राठौड़ आज कंट्रोल रूम रो दौरा कर व्यवस्थावां रो

जायजो लीनो । निगरानी रा काम मांय 42 कर्मचारियां समेत सहायक निदेशक अर अनुभाग अधिकारी पूरी सावचेती राख रह्या है । बोर्ड कानी ऊं 12 फरवरी ऊं ली जा रही परीक्षावां सारु प्रदेश मांय 6 हजार ऊं बत्ता सेन्टर बणायी ज्या है ।

000

जैसलमेर रा सोनार किला मांय 'ईट राइट इंडिया' अभियान रा तैत आज चिकित्सा अर स्वास्थ्य विभाग री ओर ऊं 'ईट राइट मेळो लगायी ज्यो । मेळा मांय वठे रा लोगां सागे देशी-परदेशी सैलाणी ई उमाव सागे सिरकत कीनी । मेळा रो मकसद बाजरा, ज्वार अर रागी सरीखा मोटा अनाज काम लेवण रा बारा मांय जाग जगावणो हो । मेळा मांय न्यारी-न्यारी स्टॉलां रे जरिये मोटा अनाज ऊं बणी खाण-पीण री चीजां ऊं पोषण री जाणकारी दीरीजी । सैलानी ई ई नवाचार री सराहवणा कीनी ।

000

श्रीगंगानगर री श्रीकरणपुर नगर पालिका बुजुर्गा रा सुबीता सारु ई-रिक्शा सेवा चलायी है । ई रा तैत 60 साल ऊं बत्ती उम्र वाळा बुजुर्गा ने जन्म, मौत अर ब्याह रा सर्टिफिकेट सरीखा कागजात घर बैठ्यां ई मुहैया कराया जावेला । आ 'डोर स्टेप डिलीवरी' सेवा सरु करण वाळी राज्य री पहली नगर पालिका है । ई सागे ई बुजुर्ग महिलावां ने अस्पताल, रेलवे टेशन अर बस स्टैंड तांई छोडबा सारु ई मुफ्त ई-रिक्शा सेवा चलायी जावेला । अ रिक्शा महिला ड्राईवर ई चलावेला जो बुजुर्गा कानी ऊं फोन करता ही वां रे घर पूग जावेला ।

000

चूरु मांय 20 ऊं 22 फरवरी तांई राख्यो जावण वाळो चूरु महोत्सव-2026 टाल दियो ज्यो है । नगर परिषद आयुक्त अभिलाषा सिंह बतायो के स्कूल-कॉलेज रा विद्यार्थियां रा इम्तिहान ने ध्यान राखता थकां ओ फ़ैसलो करी ज्यो है । वे कह्यो के इम्तिहान पाछे महोत्सव री नुवी तारीखां रो ऐलाण कर्यो जावेला ।

000